



## Protocol

### Radunanza cumünala dals 2.12.2013

Presidi: Peer-Puorger Victor  
Preschaint: 35 votantas e votants  
S-chüsà: Gerhard Hauser ed Andrea Pua  
Scrutinadurs: Erich Caviezel e Linard Mayer (Vnà)  
Protocol: Luzzi-Barblan Georg

---

tractandas	tema	responsabel
23	011 Legislativa <b>Acconsentimaint protocol</b>	
24	830 Turissem <b>Ledscha da taxas da cura e da promoziun da turissem</b>	
25	021 Administraziun da fabrica <b>Cumprita da terrain da fabrica</b>	
26	790 Planisaziun dal territori <b>Ingrondimaint zona da mansteranza a Plan da Muglin Ramosch</b>	
27	390 Baselgia <b>Dumonda da credit corporaziun da baselgia Tschlin - Strada - Martina - fr. 83'000.00</b>	
28	011 Legislativa <b>Varia (radunanza cumünala)</b>	

011 Legislativa

23 **Acconsentimaint protocol**

Il protocol dals 10 settember 2013 vegn approvà.

830 Turissem

24 **Ledscha da taxas da cura e da promoziun da turissem**

La nouva ledscha da cura e da promoziun da turissem es gnüda elavurada sün basa da la ledscha dal cumün da Ramosch. Nouv però es la spartiziun da la ledscha e las taxas. Las taxas da cura e da promoziun da turissem vegnan integradas i'l uorden da taxas existent.

Il capo repassa la nouva ledscha artichel per artichel. La radunanza accepta unanim la nouva ledscha da taxas da cura e da promoziun da turissem dal cumün da Valsot. Quista ledscha va in vigur retroactivmaing süls 01.01.2013.

Sco prossem vegn trattà il uorden da taxas. Sper las taxas d'aua, aua persa ed immundizchas vegnan uossa integradas eir las taxas da cura e da promoziun da turissem. Il capo el chanzlist infuormeschan l'andamaint da la realisaziun da las taxas. La radunanza acconsentischa unanim las taxas da cura e da promoziun da turissem. La ledscha el uorden da taxas ston gnir acconsentits eir davart dal chantun resp. regenza Grischuna causa chi's tratta d'impostas.

021 Administraziun da fabrica

25 **Cumprita da terrain da fabrica**

Sar Reto Fili avaiva cumprà ils 27.04.2012 la parcella no. 4692 cul intend da fabricar infra 2 ons sün quella parcella. Uossa ha el üna piazza gio la bassa e nun es plü interessà vi da la parcella. Il cumün avaiva ün dret da precumprita sün quista parcella. Sar Fili ha dumandà scha'l cumün ha interess da cumprar inavò. La suprastanza cumünala propuona a la radunanza da cumprar inavò la parcella. La radunanza cumünala decida unanim da cumprar inavò la parcella no. 4692 a Martina.

790 Planisaziun dal territori

26 **Ingrondimaint zona da mansteranza a Plan da Muglin Ramosch**

A Plan da Muglin, Ramosch es la zona da mansteranza dovrada sü. Per pudair pussibilitar a dittas da fabricar dess la zona in Plan da Muglin gnir ingrondata cullas parcelas chi's rechattan tanter la chasa d'abitar (chasa no. 90) e la sarinera dal cumün. Quia as tratta d'üna surfatscha da ca. 1 hectara. Actualmaing as rechattan quistas parcelas il perimeter da meglioraziun. Culs possessurs esa gnü suottascrit contrats da cumprita. Unic cun duonna Belinda Conradin esa gnü stipulà ün contrat ün zich plü special causa la situaziun el bsögn da las parcelas in colliaziun culla pensiun da chans. Ils contrats sun tuots fingià gnüts suottascrits.

Sper la zona da mansteranza infuormescha il capo sur dal intend da realisar plü tard üna nouva via chi maina da Tschern fin giò pro la zona da mansteranza a Plan da Muglin. A regard ils cuosts, per pudair plü tard vender terrain illa zona da mansteranza, es il böt da restar suot fr. 200.00 per restar lucrativa per dittas chi tscherchan terrain da mansteranza.

Sar Curdin Müller dumonda scha la realisaziun da quista nouva zona da mansteranza ha üna tscherta influenza sülla zona da mansteranza a Sclamischo. Il capo infuormescha, ch'in avegnir saran las prescripziuns davart dal chantun sgüra plü restrictivas per realisar novas zonas. Sch'ün ingrondimaint fa dabsögn a Sclamischo schi sarrà quai però sgüra in ün möd pussibel.

Sar Benedict Denoth dumonda schi nu's pudess resguardar quista nouva via da Tschern fin pro la zona da mansteranza a Plan da Muglin eir il rom da la meglioraziun. Eir l'agricultura trarà a nüz quista via per sfrüar las parcelas agriculas existents in quella regiun. Clà Nogler, sco president da la società da meglioraiun, piglia posiziun in merit e manzuna chi sarà difficil a retrar subvenziuns causa cha quista via sarrà pertocca be minimalmaing sco via agricula.

Jachen Andrighetti voul savair scha la vendita dal terrain illa zona da mansteranza vegn davant radunanza cumünala. Il capo conferma quista dumonda, mincha vendita gnarà davant radunanza.

Duri Janett giavüscha cha cul'acconsentimaint da quista nouva zona da mansteranza as dessa eir suottametter la cundiziun chi vegn tscherchà pussibilitats per ingrondir la zona da mansteranza a Sclamischo. Il capo fa la proposta da laschar protocolar explizit quista cundiziun.

Michel Häfner ed eir Jon Häfner voutan gnir infuormats sco chi stà a regard il cunfin da la zona da privel a Plan da Muglin. Differentas instituziuns chantunales han analisà la situaziun e fat üna proposta al cumün. Quists cunfins sun gnüts resguardats per realisar la nouva zona. La zona blava chi's rechatta illa zona da mansteranza das-cha bainschi gnir tratta a nüz ma nò surfabricada.

La radunanza decida cun 30 cunter 5 vuschs per la realisaziun da la nouva zona da mansteranza a Plan da Muglin.

390 Baselgia

**27 Dumonda da credit corporaziun da baselgia Tschlin - Strada - Martina - fr. 83'000.00**

Il fabricat es plü o main fingià realisà. La corporaziun evangelica ha dumandà quist credit per pudair pajar ils quintes finals chi seguran dal 2014, uschè il president Georg Häfner. Il capo infuormescha cha la corporaziun prevezza da pajar inavo in fuorma d'acontos il prüm fr. 13'.000 e davo minch'on 10'000.00 (inclus ils fits). La radunanza decida unanim da conceder quist credit.

011 Legislativa

**28 Varia (radunanza cumünala)**

Duri Janett metta in dumonda il sistem da dumandar pro mincha decisiun da la radunanza cumünala la quantità da vuschs ed il retegn da vuschs. Tenor el nu fa quai dabsögn da dumandar sch'inchün retegna la vusch, tenor el basta las vuschs pêr e cunter. Il capo piglia incunter quista dumonda e comunichescha a la prossma radunanza il sistem güst per vuschar. Implü voul Duri Janett savair cur cha la pagina d'internet vegn tradütta in rumantsch. Previs esa dad implir il prüm il text tudais-ch e lura da surdar ad ün büro la traducziun in rumantsch.

Davò cha'l capo aviava infuormà pro l'ultima radunanza cha'l cumün sia per la prüma jada davant güdisch cun ün cas d'üna dumonda da fabrica s'infuormescha Dumenic Luzzi regard ün'eventuala decisiun dal güdisch.. Il capo infuormescha cha la sentenza nun es amo tratta.

Per finir ingrazcha Benedict Denoth per la bella decoraziun resp. bös-chins da Nadal cha'l cumün ha miss sü.

Qua ch'ingün nu pretenda plü il pled, ingrazcha il capo per la cumparsa e giavüscha a tuots üna bella saira.

7556 Ramosch, 19.12.2013

Il capo:

Il manader administraziun: